



Komisija za očuvanje nacionalnih spomenika, na osnovu člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 2. do 8. marta 2004. godine donijela je

## ODLUKU

### I.

**Graditeljska cjelina - Crkva sv. Prokopija u Visokom** proglašava se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik sastoji se od crkve, crkvenog dvorišta, ogradnog zida, ulazne kapije, parohijskog doma i pokretnog naslijeđa koje čini 18 ikona:

1. Deizis sa arhanđelima Mihajlom i Gavrilom
2. Uskrsnuće Hristovo sa prazničnim scenama
3. Madona sa Hristom
4. Sv. Nikola
5. Sv. evanđelist Marko
6. Krštenje Hristovo
7. Sv. Georgije ubija aždahu
8. Bogorodica sa Hristom
9. Sv. Petka i sv. Dimitrije
10. Sv. Nikola
11. Sv. Mitar
12. Nerukotvoreni Hristov lik na ubrusu, Mandilium
13. Jerusalem
14. Jerusalem
15. Sv. Luka
16. Sv. Marko
17. Sv. Jovan
18. Sv. Matija

Nacionalni spomenik se nalazi na lokaciji koja obuhvata k.č. broj 5/140, z.k. uložak broj 3256 k.o. Visoko, Općina Visoko, Federacija Bosne i Hercegovine, Bosna i Hercegovina.

Na nacionalni spomenik se primjenjuju mjere zaštite utvrđene Zakonom o provođenju odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini ("Službene novine Federacije BiH" br. 2/02, 27/02 i 6/04).

## II.

Vlada Federacije Bosne i Hercegovine ( u daljnjem tekstu: Vlada Federacije) dužna je da osigura pravne, naučne, tehničke, administrativne i finansijske mjere za zaštitu, konzervaciju i prezentaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacione ploče sa osnovnim podacima o spomeniku i odluci o proglašenju dobra nacionalnim spomenikom.

## III.

S ciljem trajne zaštite nacionalnog spomenika, utvrđuju se sljedeće mjere zaštite koje se odnose na lokaciju utvrđenu u tački I stav 3. ove odluke:

- zabranjeno je izvođenje bilo kakvih radova na objektima koji čine graditeljsku cjelinu osim radova na preventivnoj zaštiti i konzervatorsko-restauratorskih radova uz odobrenje projekta od federalnog ministarstva nadležnog za prostorno uređenje i stručni nadzor službe za zaštitu naslijeđa na nivou Federacije Bosne i Hercegovine (u daljnjem tekstu: nadležna služba za zaštitu);
- sanirati klizište koje se nalazi sa zapadne strane od kompleksa Crkve sv. Prokopija;
- sanirati krov i krovni pokrivač, izvršiti konzervatorsko-restauratorske zahvate na zaštićenoj zbirci ikona na osnovu elaborata koji je odobrilo federalno ministarstvo nadležno za kulturu i uz stručni nadzor službe za zaštitu;
- osigurati odgovarajuće uvjete za smještaj, čuvanje i prezentaciju kompletne zbirke ikona, kao i arhivske i druge pisane građe;
- na susjednim parcelama dopuštena je isključivo stambena gradnja maksimalne spratnosti P+1 i gabarita 8x8 metara.

## IV.

Stavljaju se izvan snage svi provedbeni i razvojni prostorno-planski akti koji su u suprotnosti sa odredbama ove odluke.

## V.

Svako a posebno nadležni organi Federacije Bosne i Hercegovine, kantona, gradske i općinske službe suzdržat će se od preduzimanja bilo kakvih radnji koje mogu da oštete nacionalni spomenik ili dovedu u pitanje njegovu zaštitu.

## VI.

Iznošenje pokretnog naslijeđa iz tačke I stav 2. ove odluke iz Bosne i Hercegovine nije dopušteno.

Izuzetno od odredbe stava 1. ove tačke, dopušteno je privremeno iznošenje pokretnog naslijeđa iz Bosne i Hercegovine radi prezentacije ili konzervacije ukoliko se utvrdi da konzervatorske radove nije moguće izvršiti u Bosni i Hercegovini.

Odobrenje u smislu prethodnog stava daje Komisija ukoliko nedvosmisleno bude utvrđeno da to ni na koji način neće ugroziti pokretno naslijeđe.

U svom rješenju o odobrenju privremenog iznošenja pokretnog naslijeđa Komisija utvrđuje sve uvjete pod kojima se to iznošenje može da izvede, rok za vraćanje spomenika u Bosnu i Hercegovinu, kao i zaduženja pojedinih organa i institucija na osiguranju tih uvjeta i o svojoj odluci obavještava Vladu Federacije, nadležnu službu sigurnosti, carinsku službu Bosne i Hercegovine i javnost.

#### VII.

Ova odluka dostavit će se Vladi Federacije, federalnom ministarstvu nadležnom za prostorno uređenje, federalnom ministarstvu nadležnom za kulturu, nadležnoj službi zaštite i općinskim organima uprave nadležnim za poslove urbanizma i katastra radi provođenja mjera utvrđenih u tač. II - VI ove odluke i nadležnom općinskom sudu radi upisa u zemljišne knjige.

#### VIII.

Sastavni dio ove odluke je obrazloženje sa pratećom dokumentacijom koje je dostupno na uvid zainteresiranim licima u prostorijama i na web-stranici Komisije (<http://www.aneks8komisija.com.ba>).

#### IX.

Prema članu V stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

#### X.

Ova odluka stupa na snagu danom donošenja i objavit će se u «Službenom glasniku BiH».

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

**Predsjedavajuća Komisije**

**Ljiljana Ševo**

Broj: 07.2-2-32/04-3  
2. marta 2004. godine  
Sarajevo